

平定粵匪紀略

平定粵匪紀略卷十六

同治二年七月曾營湖口各軍攻毀文橋賊壘江西全境肅清

先是僞堵王黃文金糾合諸賊酋於二月由皖入江分擾鄱陽浮梁祁門都昌境內屢爲浙江援軍與江西防軍所扼不得深入乃折而西竄趨湖口分爲三路上路由文橋中路由梧桐嶺下路由太平關而文橋賊勢最重堵逆親踞其中浙江鹽運使李榕統帶鈞字營自彭澤項家山一捷後聞湖口告警於五月

十四日至湖口之三里街提督江忠義亦自九江東渡來會紮堅山以逼之六月十七日賊自文橋撲犯堅山營盤江提督令各營直前迎敵適李榕亦率隊會勦賊始卻退十九日賊以大股匿於酬山以小股誘戰江提督戒堅壁不動賊始計沮悉衆來攻我軍但以槍礮外擊忽有一酋指麾衆賊賊無反顧者江忠義詢之降卒知爲堵逆聚槍一發應聲而仆賊衆爭昇以行相率奔竄堅踞文橋不復出戰二十八日敗賊於陳兵馬地方二十九日復在花尖山毛家店

鏖戰會浙江援軍按察使劉典及席寶田顧雲彩屈
蟠各軍擊賊於南路青山橋斬馘二千有餘屈蟠復
敗之於段家洲賊始有退志七月初三日夜江提督
在堅山營中俯瞰文橋七壘火光熒熒若隱若現度
賊將遁遂約李榕出隊會勦賊不虞我軍猝至惶懼
無措各勇踰濠蟻附而升立將文橋七壘平毀日夜
追勦直出建德所屬之羅家畝積尸塞道時僞祐王
率援賊數萬抄出官軍之後都司夏基鴻等斂衆血
戰短兵相接以一當百賊始大潰向建德遁去各營

裹糧窮追殲斃無數江西境內一律肅清

上海軍攻毀太湖賊營直逼蘇城並進攻江陰蹋平附城賊壘

上海官軍自攻毀沿湖賊卡後程學啓至吳江與太湖水師會夾浦口督師船槍隊嚴陣而前盡下沿湖賊卡湖濱有大關口逆衆憑湖設立兩營一卡堅守死拒爲蘇嘉賊之津渡七月初七日學啓率親軍礮隊當中路太湖水師四營分攻其東西歐陽利見截賊後先敗東山援賊學啓謂賊營如鳥翼當先攻北

岸遣敗死士五百越水夜襲之開礮環擊轟斃悍賊
無數左有才等督軍奮勇先登歐陽利見等截扼飛
虹橋口並斬斷浮橋賊不得遁悉數殄滅斃賊首徐
尙友一名其南岸賊營望風奔潰官軍乘勢追殺並
將洞庭東山打館之賊全行誅戮計斃二千餘人落
水死者不計其數程學啓等遂督軍圍逼蘇州進屯
跨塘鳳凰頸唐家濱水師進金雞湖獨池湖大牛橋
陽城後湖與婁門葑門相距數里而太湖水師亦泊
南舍鎮時總兵劉銘傳將攻江陰統領李鶴章先遣

七營至楊舍助之初七日敗賊於黃山及東門外斬首數百級生擒百餘名獲偽安福等數名逆衆於城外四門分營踞守劉銘傳於十一日蹋毀北門賊壘十二日各營會攻東門將石營三座次第攻克並將逆衆歸路截斷四面兜殺生擒偽天將及偽燕侯等十餘名斃賊千餘名擒斬賊酋二十餘名各軍已滾營進紮逼城而陳

克復楓涇鎮並浙江嘉善縣之西塘鎮

逆匪大股拒守楓涇鎮李巡撫派令編修劉秉璋等

各營進紮官塘七月十二日賊衆撲拒道員潘鼎新
帶隊迎擊斃賊多名賊敗回巢濠牆甫就賊復來撲
勢甚兇猛潘鼎新令洋槍隊排擊燃礮猛轟各營分
路包抄逆衆驚潰擒斬百餘名奪獲槍礮旂幟無數
十三日劉秉璋等三路竝進賊匪不出各營連放炸
礮轟倒石壘數處忽浙江嘉善縣援賊大至楓涇逆
匪突出數股迎拒游擊蔡渭川等開礮猛攻自辰至
午木椿盡拔遂分隊繞過賊營之西將援賊擊退副
將楊鼎勳等帶各營由浮橋渡河繞至賊營東北逆

衆憑河抗拒官軍直撲東柵兩石壘逆衆施放槍礮
子落如雨楊鼎勲督勦愈急兵勇緣牆而上噴筒火
箭齊施賊營登時火起悍賊均被焚死左旁壘賊奪
門出竄斬馘數十名餘悉就擒街中踞逆膽落驚走
各軍趁勢追殺復奪石壘一座賊卡七處計焚溺殺
死賊三四千人生擒五百餘名我勇傷亡百數十人
是日都司曾守忠督礮船由楓涇西路亦將茜涇塘
賊壘一座攻克自楓涇克復後嘉興平湖乍浦各賊
來援嘉善者約三四萬人分踞於千窰西塘等處綿

亘二十餘里十八九日各營水陸齊集秉璋等由楓
涇進西塘太湖水師二營來會淮揚水師張元龍由
蘆魁塘攻西柵楊寶勝朱開泰由楊匯攻北柵援賊
分路迎拒另股由干窰出撲經水師擊退烏涇塘大
路之賊蠡擁而來鎮賊亦由南柵衝出楊鼎勲飭勇
排放洋槍斃賊無數賊潛分兩翼從東西街口撲出
楊鼎勲膝受槍傷裹創力戰官軍勇氣百倍賊隊稍
稍搖動參將江福山先由馬鳴庵橫河衝入烏塘斷
干窰之道副將熊殿元銜尾連進環施排礮復出隊

登岸斷賊往來之路逆衆首尾不能相顧英國人馬
格里以開花礮轟擊大隊悍賊斃十餘人楊鼎勳等
督勇四面兜殺逆隊紛紛墜河生擒七百餘人內有
洋匪七名爲賊領隊立時傷斃副將張元龍等分攻
北柵西柵各斬馘數百人生擒數十人當將逆壘攻
克西塘鎮一律肅清餘賊竄併干密一路二十一日
復派游擊劉起帶隊進勦甫至中界賊衆出拒劉起
首先衝入殺騎馬賊目一名各勇奮呼直前賊遂驚
潰蹋破石壘一座土壘兩座計斃賊二三百名生擒

五十餘名餘賊遁入嘉善城統計擒斬溺斃悍賊四
五千人獲逆首僞王宗廖姓僞鑼天安施得桂僞敬
天福汪敬之僞鐙天侯曹盛勇訊明正法我軍傷亡
不及百人

八月上海軍克復江陰縣

江陰踞逆日久負嵎李巡撫督飭總兵劉銘傳等帶
兵進攻屢獲奇捷賊勢漸蹙七月十三日逆首陳坤
書及潮逆武逆齊逆區逆五大股糾衆十餘萬人由
常州等處分道來援綿亘數十里統領知州李鶴章

由常熟至以洋槍隊敗之因賊衆我寡久恐難支立
調副將張樹珊等由常熟福山馳往救援並調總兵
郭松林等八營橫衝賊後勦破祝塘璜塘賊巢乃出
周莊與樹珊會且戰且進沿途擒斬四千人直逼
城邊李鶴章劉銘傳周覽縣城四圍賊勢西自江邊
東至山口沿途焚木城十餘座其中石營土壘木卡
大小百餘座守禦極堅因合水陸各營分路進攻豫
爲部署七月二十九日五鼓郭松林督樹珊等七營
馬隊埋伏山後劉銘傳由中路進副將周盛波周盛

傳循城出其右先擊東南大隊援賊又以四營出城西綴無錫援賊而黃翼升水師扼江干會勦誘賊出敵自辰至己逆衆隊伍林立層層抵拒郭松林忽自山後翻上逆衆拚命血戰郭松林大呼殺入橫衝直突逆衆尾隊撤動頭隊遂亂劉銘傳張樹珊揮衆直擣中堅賊遂大潰各軍追殺人馬自相踐蹋死者山積其附城踞守各賊營見援賊敗走惶惑不定我軍乘勢促之將沿河木城石營土壘木卡百餘座一律埽蕩添調洋槍隊並帶炸礮乘勝轟擊先將石營一

座轟塌各勇越濠踰牆逆遂棄營而走其餘各營之賊悉被殲擒提督黃翼升又將極西山邊賊營攻破於是城外各股援賊勦逐淨盡李鶴章飭各營將該城四面圍困七月三十八月初一等日官軍分投攻打礮力所及賊垛望樓大半塌毀賊有內應者是夜三鼓兵勇緣梯而登隊伍相繼呼聲大震守賊下城巷戰我軍槍礮密如雨集賊衆披靡僞廣王李愷順墮水死間有小路衝出之賊又被官軍擊回無得脫者當將江陰縣城克復

上海軍攻克蘇州寶帶橋賊壘

總兵程學啓進規蘇州營於外跨塘距婁門七里時
附城賊壘十九礮遠不能及八月初四日學啓至永
安橋賊由婁葑齊三門出學啓以水陸三路當之敗
援賊遂營於永安橋壘有擒斬城東南寶帶橋爲太
湖鎖鑰賊立石營一土營三悉力拒守學啓與戈登
謀先取之時官軍雖屢捷而賊壘堅固猝不得前因
先期令陳東友俞卿統礮船下黃天蕩李朝斌水
師入寶帶橋與陸師會十一日僞忠王李秀成自金

平定縣志卷之六
陵返蘇州圖解圍十六日水陸皆至宋有勝張行科
襲其右陳忠德朱定元襲其左李朝斌督水師八營
入尹山橋爲中路洋將戈登龐發乘輪船繼之先攻
土營賊棄壘奔石營亦旋潰追至盤門沿途截殺平
燬賊卡十餘座李秀成親率悍逆來援學啓督飭諸
軍擊卻之分扼水陸要道屬戈登龐發駐守寶帶橋
李巡撫又檄張遇春等四營往助

浙軍克復富陽縣

逆匪竄併富陽負嵎抗拒左總督派令藩司蔣益澧

督軍圍攻八月初七日益澧令游擊徐文秀進攻雞籠山賊壘副將楊政漢等攻倚城賊壘自率親兵督戰逆衆見官軍大至齊出猛鬪徐文秀等督隊奮擊攻破頭層賊壘逆衆拚死回拒槍礮如雨官軍鼓譟大進游擊余朝貴繼之槍入二層賊壘賊勢不支余朝貴等復奮力衝殺斃賊百餘名將大小賊壘賊卡盡行攻破新橋出賊千餘來援亦經徐文秀等擊退益澧令徐文秀等因賊舊壘背水結營其原泊江中拖罟廣艇及對岸大小礮船連放炸礮向城轟擊城

賊大震楊政漢等會同洋槍隊攻倚城大壘城賊出墜來迎益澧令副將劉清望等助戰徹夜轟擊城賊壘賊中傷者不計其數初八日黎明益澧親督參將李運榮等馳往助勦官軍倍加奮迅首先攻破賊壘一座賊勢靡亂不敢入城向新橋一路逃竄總兵王月亮等率所部截殺又斃賊數百名徐文秀等由雞籠山繞出新橋併力追殺遂將富陽縣城克復其新橋各營踞逆經高連升等督率各營亦於是日分道進攻該逆出悍黨萬餘迎敵諸軍奮力痛擊立破賊

壘六座殺賊數百名劉清亮等亦蹋平賊壘五座
賊七百餘名徐文秀等督兵追至合兵長驅大進共
破賊壘三十餘座沿途斃賊無數內有賊目多名生
擒七百餘名奪獲旂幟千餘面輜重器械馬匹偽印
無算富陽一城爲杭城鎖鑰逆賊久踞堅守與新橋
賊壘相爲犄角此次各軍晝夜環攻將賊壘悉數殲
除足以振軍威而寒逆膽

江甯陸軍毀上方橋江東橋諸賊壘

自逆賊占踞金陵逆酋楊秀清布置最密城外如九

一
洲七里洲中關下關雨花臺紫金山秣陵關江東
橋上方橋等處類皆築壘如城掘濠如江爲堅不可
拔之基經曾巡撫攻克數處聲威已震七月初復攻
克印子山賊巢當以江東橋爲西南要隘飭候補道
陳湜圖之上方橋爲東南糧道飭提督蕭慶衍圖之
七月二十日蕭慶衍出印子山之東逼壘下寨二十
二日曾巡撫復派數隊滾營而進更紮蕭慶衍新壘
之前昇巨礮晝夜環轟賊衆堅壁不出曾巡撫於二
十九日潛遣總兵熊登武等繞出上方橋槍築大小

營以截賊後賊糾衆來撲復敗之蕭慶衍知壘賊計窮傳令各營於夜半擁至濠邊大呼猛進比賊驚覺軍士已半入壘中抽刃環刺悉就誅戮立將上方橋堅壘攻毀其江東橋石壘既堅且高外隔水二道賊有險可倚負固拒守攻逾月未下八月十一日夜風霾蔽月咫尺莫辨陳湜選銳卒數百涉流而渡特製絕大噴筒向壘飛擲賊方驚眩不已我軍已衝過浮橋陳湜督大隊繼進有緣梯而上者有向礮眼中蛇行而入者遂拔石壘並將衆壘一鼓下之城中出援

之賊適遇總兵蕭孚泗自賽洪橋突出搏鬪移時亦受創而遁

青陽防軍固守三十八日援師大捷立解城圍

僞堵王黃文金等七悍酋擁十數萬衆在都昌湖口彭澤一帶戰敗而東遂略池州直薄青陽城外不數日間近城半里環築六十六壘又數里築七十餘壘八月初旬以後無日不戰戰或小勝而守將朱品隆病甚勢漸不支浙江鹽運使李榕於八月初十日率隊至洪山口攻破袁橋賊卡城中亦出隊應之十八

日曾大臣所訓之總兵喻吉三陸師及彭侍郎所派之總兵喻俊明水師進紮徐家邨提督江忠義記名道席寶田亦先後踵至衆心稍安二十一日喻吉三等有袁橋之捷二十四日席寶田由五溪橋踰嶺攻破賊卡賊匪驚潰軍勢至此一振適彭侍郎來自池州周歷形勢於二十七日商令江提督等軍出董家邨山後包抄派各軍分路接應五更蓐食江提督親督所部行近董家邨解衣覺水渡河從山後榛莽中緣巖而上盡殺巖腰之賊驟攻賊壘賊黨糾合大股

冀抄我軍後路江提督揮隊直前縱橫盪決喻吉三亦麾軍助戰賊隊敗若湧潮中路堅壘旣下左路二壘悉平適李榕由獅子山繞至邨口賊衆駭奔遙望西北附郭一帶烟燄蔽天知守城之軍自內擊出一鼓猛進悉平一百三十餘壘殲逾萬人餘賊遁歸石埭一路青陽之圍立解計防軍若守三十八日米盡食馬馬盡掘麻根以充腹麻根漸盡而援兵至矣逆匪自江西各路所擄米穀不下三四萬石全爲我有上海軍進攻無錫擊敗水陸援賊

李巡撫議進取無錫八月十一日派郭松林督隊至
緱山十二日破賊營於新塘橋並敗援賊二十日統
領李鶴章令張樹聲滕嗣武列隊芙蓉山立營以禦
賊突有逆衆七八千人出惠山西北塘頭嚴埭來撲
各軍迎前擊退追入嚴埭王東華水師從大圩駛入
夾擊連奪賊卡乘勝追至城根立將西北兩門各賊
壘一律平毀李鶴章復飭各隊分路進攻均有斬擒
並焚燒舳板賊船十餘號二十六日僞侍王李侍賢
等合股內犯由無錫南門至坊前梅邨三十餘里逆

氛甚熾高橋大股亦分衆七八千人擾至西高山出芙蓉山後城賊出北門犯塘頭東亭二十八日官軍分路迎勦郭松林督帶馬隊衝出東路設伏誘擊賊隊大亂悉自梅邨坊前敗走張樹珊滕嗣武等軍由東王橋包抄夾擊擒斬千餘人逆衆復出礮船數十號抄襲張樹聲由東亭迎勦揮隊截擊並飭礮船助勦將陸路之賊殲戮殆盡並奪獲賊船五六十號民船四五百號生擒賊目三十餘名西路高橋大股及北門出竄之賊亦經周盛波等奮力擊退僞出逆復

糾合水陸賊匪十餘萬由蘇州竄出帶火輪船開花
礮船多隻直犯大橋角營李鶴章督軍飛援周壽昌
率親兵數十人向輪船施放火箭箭入藥舵轟燃火
發並燒毀長龍炸礮船兩隻舢板船六隻焚斃逆匪
二三百名對河悍逆復由浮橋偷渡圍逼官軍營盤
由西面填濠拔樁越入吳勝清督率各軍施放火彈
槍礮堵擊賊尸狼藉適援軍大集勇氣百倍張樹珊
領洋槍隊衝擊斃賊百餘賊猶死拒各軍分隊抄擊
連拋火彈延燒逆衆藥簍張士芳從烟燄中揮軍直

入往來馳突四面環攻逆眾奪路奔竄復被蕭鳳高等率劈山礮隊扼橋截擊斃賊數百名餘匪落河溺斃者無算南面之賊竝經黃提督等率隊用洋槍橫擊轟沈賊船多隻生擒逆匪二百餘名大橋角營之圍立解其退踞黃埭及長竄猴山等處之賊均爲官軍連日擊退擒斬甚多竝燒毀火輪船礮船多隻訊據擒獲賊供僞祥王黃隆芸僞忠王之子均被官軍楚勦落水淹斃

陝西漢中府城固縣先後失守

髮捻各逆自正月內由興安分竄二月陷紫陽旋退出撲漢陰廳石泉縣均得固守是月合竄漢中府旁擾城固縣藩司毛震壽疊次截擊以賊勢太衆漢中府於八月二十日城固縣於二十七日各失守

九月甯國涇縣防軍疊獲勝仗

七月下旬太平逆酋古隆賢石埭逆酋賴文鴻等乘青陽被圍官軍不暇兼顧之時各糾大股蓄意犯涇以古逆一股踞茂林潘邨等處以賴逆一股踞丁家渡張家渡等處甯國守將劉松山督隊於八月初八

日馳抵涇縣與守涇之總兵易開俊會商勦辦初九日先將張家渡賊館洗盡十六日馳擊茂林至則鳳邨李邨之賊聞風悉遁乃環攻茂林賊壘擊傷古逆立燔巨壘二座其潘邨三壘亦爲別隊所破於是合軍追逐又蹋平二壘於潘邨之後餘黨向太平老巢而遁甯國北路之賊一聞劉松山赴涇卽謀襲郡城十四日劉松山引軍馳回設伏敬亭山以待十八日賊數千人蠶擁而至號鼓一發爭拔鹿角踰濠競進劉松山突啓北門鼓譟而出賊不及備倉皇欲遁適

西門各隊追賊而來遂橫斷歸路賊乃東趨廟埠又爲劉松山所蹙相率循河下竄維時涇之水南都尙有踞匪二十四日易開俊破之於丁塘田坊四頁邨等處九月初三日追至平垣賊踰崖而逸初七日晏公塘等股匪退併風坑易開俊卽於初九日出隊琴溪橋下設伏敗之賊遂往甯國縣一路

上海軍攻克蘇州五龍橋賊壘分勦嘉湖援賊

我軍旣克寶帶橋而橋西五里有五龍橋賊尙據之以通浙省八月十九日李秀成率黨來攻寶帶橋營

程學啓戈登水陸合禦竟日始却二十六等日城賊分出閭齊葑等門來犯又犯大橋角七星橋皆擊走之學啓與戈登謀先攻五龍橋賊壘以絕盤門出太湖之道九月十一日學啓自率水陸七營出寶帶橋戈登乘輪船與周正林水師會鮎魚口爲左右路李朝斌水師進澹臺湖爲中路先後破賊六營截殺營賊幾盡立將五龍橋賊壘攻克張遇春又敗盤門援賊時嘉湖賊犯平望十四日學啓屬戈登守五龍橋自率水陸於十五日分道進勦途中賊卡均下會軍

於八坂擒僞貴王陳得勝斃賊三千人毀賊營三十
餘座獲賊船數百隻追賊至平望斷其橋蘇州賊益
奪氣

江甯陸師疊收東南沿河要隘再克秣陵關

我軍攻克江東橋上方橋後尙有城東數隘未下近
城者曰中和橋曰雙橋門曰七甕橋稍遠者曰方山
土山曰上方門高橋門迤南則爲秣陵關以至於博
望鎮皆金陵之外輔也曾巡撫以東路未平不能制
賊死命遂令提督蕭慶衍等東渡立營詎賊已先築

數壘以拒我九月二十日蕭慶衍等揮軍從上下游過河破五土壘俄而城壘各賊來爭經我軍擊退將東岸營壘築成二十二日賊又諸道竝出各營奮力競進賊黨靡然返竄遂克上方門高橋門橋雙門諸石壘而右路方山土山之賊亦各棄壘而奔於是七堯橋踞賊惶遽欲遁正謀一鼓併下忽城中出大股來援總兵蕭孚泗等急督各軍合力卻之仍復逼壘環攻二十四日夜間遣死士潛往縱火賊衆冒烟突出乃將七堯橋賊壘攻克其博望一鎮總兵朱南桂

己於先五日襲取之曾巡撫以博望鎮既得則秣陵關之勢孤七壘橋既得則中和橋之勢孤二十五日派總兵伍維壽等南略秣陵關候補道陳湜等出七壘橋之西與總兵熊登武等會師於中和橋一戰克之秣陵關之賊見我馬步馳至卽棄釜奔潰追及河干斬二百餘人而還白是紫金山西南無一賊巢矣古隆賢率衆投誠重復石埭太平旌德三縣

石埭太平旌德失陷後爲僞匡王賴文鴻僞奉王古隆賢分踞及賴文鴻爲涇軍所敗遁入甯國縣而三

縣遂爲古隆賢獨踞八月間青陽之捷賊黨震懼古隆賢遣人於總兵朱品隆處通款願與衆獻城乞貸一死朱品隆察其窮餓歸誠爲請於曾大臣許其降九月二十八日親赴石埭宣諭降衆竝調踞守太平之江老三歸併石埭給資遣發遂於二十九日前往太平收復城池初江老三方以太平來獻而僞天將江會義率黨叛往廣德二十七日涇縣守將易開俊橫出擊之斬馘頗衆乃引軍進次旌德賊已聞風先遁餘黨盧旺有等聚城歸降於是三城悉復

十月上海軍攻蘇州疊克賊壘

我軍自大橋角之戰賊勢漸蹙李秀成仍糾無錫溧陽宜興之賊八九萬船千餘隻泊運河口而自率悍賊踞金匱縣之后宅連營互進統領李鶴章謂賊方倚河爲固步步爲營我軍不宜浪戰亦當結營制之九月初八日自督隊至后宅而令滕嗣武張樹珊赴大橋角立四營初九等日疊敗坊前梅邨安鎮鴻山之賊李巡撫以賊之巨股全集西路志在保無錫以援蘇州檄鶴章等堅立營壘固後路乘間翻營擊賊

而令程學啓戈登由蘇州橫出賊後時潘郎中曾瑋
進攻蠡口黃埭之策學啓從之十九日會同戈登等
乘夜督帶輪船洋槍隊進攻蘇州齊門外之蠡口賊
營戈登連開炸礮傷賊多名程學啓督水陸各軍環
攻兩時之久賊勢不支官軍礮隊分路踰牆襲入立
將蠡口賊營攻毀殲斃悍賊千餘名城內之賊糾衆
來援亦經我軍擊敗十月初一等日程學啓督飭各
軍進攻黃埭賊壘逆首萬國鎮糾衆突圍程學啓戈
登等督放開花礮子落如雨乘勢越濠直入黃提督

復令水師登岸夾擊賊衆紛竄當將黃埭等處賊壘
四座攻毀擒斬二千餘名生擒僞天將萬國鎮一名
其蘇州無錫交界及無錫西北惠山一帶復有僞忠
逆李秀成糾股分踞圖抗官軍經李鶴章督率各營
分布夾擊連日疊有斬擒九月十六等日李秀成見
東路備嚴乃西犯大橋角黃中元帶隊擊卻躡蹤追
勦擒斬五六百人蹋毀後宅南塘等處賊營十一座
二十七日秀成悉出其黨列隊以拒李鶴章復約諸
軍滾營前進分攻坊前梅邨茅塘橋賊壘逆衆扼興

隆橋拒守周盛波督各軍擊走沿途追躡斬獲甚多
逆衆分竄安鎮猴山等處郭松林等分股抄擊餘賊
退往嵩山官軍乘勝進攻梅邨西倉賊巢郭松林大
呼陷陣用洋槍連環排擊賊衆大潰立將梅邨賊壘
十餘座蹋平燒燬賊船多隻生擒僞護國軍師李生
香及賊目數十名擊斃僞航王唐政才一名擒獲及
淹斃殺斃賊衆六七千人竝攻毀西倉茅塘橋等處
賊壘多座秀成等始分道遁還

曾營會水陸各軍疊復水陽新河莊東壩各隘高瀆甯

國建平漂水四縣

甯國太平以東久爲賊藪九月間彭侍郎率總兵喻
俊明等約記名道吳坤修等陸師將有事於水陽楊
提督岳斌亦親率戰船來會師次密灣見有大石壘
能越水陽等壘遙擊我軍至二十六日風雨蔽天喻
俊明等乘夜運礮環轟比曉石壘半圯遂鼓譟而前
吳坤修等亦駕小划入亮陡門平圩埂數壘併攻水
陽破之其南路則有水師總兵成發翔等會合總兵
王可升陸師力攻新河莊又破之水陽迤北曰滄溪

距滄溪十餘里曰唐溝爲直達高渚之要路二十九日彭侍郎令吳坤修等取滄溪而自襲取唐溝進援高渚湖口之兩壘至長樂鎮上有石城我軍直入湖心忽梗一橋洋槍集發各將弁悉力衝擊斫橋舉火併石城燔之適吳坤修等亦自滄溪戰勝而還方議合攻高渚而賊目楊友清涕泣乞撫乃受其降十月初二日入城安撫是夜略取固城鎮初三日守涇之總兵易開俊敗賊於東安鎮與甯郡守將劉松山會復甯國縣降卒萬餘畱五百人餘悉資遣之自是東

壩守賊黎立新等上書請爲內應建平守賊張勝祿
上書請獻城池時浙江提督鮑超已克東夏四壘與
彭侍郎合趨東壩繞壘圍攻僞輔王楊輔清從亂軍
中逸出守將立獻僞城遂於初七日將東壩攻克東
壩復而建平捷書亦至自總兵馮標入境宣諭張勝
祿等感激思奮卽於是日斬僞跟王藍得仁舉城以
降而踞溧水之楊英清亦願繳軍械各散回籍乃於
十二日將溧水一併收復

上海軍攻克許關虎邱等處

蘇州官軍自攻克蠡口黃埭等處賊營後由泇關一帶進勦十月初九日各軍分路繞進泇關逆已連營數十座堅守抵禦鏖戰三時戈登帶槍隊奮勇直撲立破王瓜涇口賊營六座程學啓亦將觀音廟賊營四座攻克各軍直抵關口施放洋槍火箭其斃悍賊無算遂將泇關賊營五座全行攻破程學啓復會同克根木督帶輪船進逼十里亭賊營先破其左營餘營四座亦卽敗遁虎邱賊營相繼潰走賊卡十餘座一律埽平擒斬悍賊不計其數官軍直追至閶門街

口沿途賊尸枕籍其由五龍橋進攻盤門之軍亦將賊營六座蹋毀

楚軍於陝西會勦川匪藍二順收復山陽縣

藍二順與兄藍大順由雲南昭通府倡亂擾四川同治元年四月入陝西與粵逆通藍大順踞洋縣等處藍二順踞商州之山陽縣本年十月西安多將軍隆阿督楚軍勦王閣邨等處回匪派總兵藍斯明分勦髮捻各逆是月二十二日藍總兵會漢中李京堂雲麟一軍攻山陽飭知縣匡久安督民團扼守要隘正

欲進攻藍二順聞信先於四更時東竄遂收復山陽縣率衆追及東岡痛擊之賊竄富水關沿途截擊竄至商州所屬之二郎廟等處紛紛潰散

克復蘇州省城

蘇州省城被逆匪占踞四年之久自我軍疊克要隘而賊仍於胥葑婁等門憑河築壘數十座悉精銳以守之婁門外石壘尤堅時程學啓軍於河東十月十二日李巡撫由上海至學啓軍營益下令破賊十九日我軍進攻婁門石壘學啓緣南岸戈登緣北岸而

進李巡撫親督之我軍以炸礮傾壘牆十數處賊勢
披靡李秀成譚紹洸率萬人突出婁門拒戰學啓分
隊應之賊少卻常勝軍肉薄以登立破石壘援賊遁
入城中而陳東友水師復由黃天蕩擊賊會攻婁葑
門外賊壘二十餘營皆下二十日黃翼升况文榜破
齊門賊壘楊鼎勲李朝斌張遇春破盤門賊壘於是
我軍三面水陸薄城賊黨膽寒乞爲內應十月二十
日僞忠王李秀成見官軍攻逼日緊城賊散亂帶死
黨萬餘宵遁專交老賊僞慕王譚紹洸拚死固守二

十三四等日程學啓李朝斌黃翼升等親督水陸各軍由各門分路進攻晝夜不撤愈逼愈緊戈登亦親抵城根開礮轟擊二十四日僞慕王譚紹洸上城抵拒正在對衆指揮僞納王邵永寬等商令僞天將汪有爲出其不意將譚紹洸乘隙刺殺竝殺斃譚逆死黨千餘開門迎降署其衆二十營仍屯閫胥盤齊四門邵逆並不薙髮程學啓恐不可制白李巡撫必誅之二十六日出城請謁察其狀誠叵測乃將邵永寬及僞比王伍貴文僞康王汪安均僞甯王周文佳僞

天將范啓發張大洲汪懷武汪有爲駢戮之程學啓等統帶隊伍入城彈壓並殺斃餘黨悍賊數千名李朝斌等復由盤門等處截殺斃賊多名解散數千人立將蘇州省城克復捷

聞奉

旨曾大臣從優議叙李巡撫加太子少保銜並

賞穿黃馬褂提督黃翼升等給賞有差權授江蘇省總兵

戈登賞給頭等功牌並銀一萬兩以示嘉獎

十一月蘇州軍攻克無錫金匱縣城生擒首逆

官軍進攻蘇州時統領李鶴章方督軍進取無錫蘇賊分黨來援鶴章等滾營搏戰凡十晝夜賊始卻十月十六等日攻克三里街萬壽橋等處賊壘時無錫之賊北聚於高橋南聚於望亭二十一日克高橋二十六日克新安望亭等處賊壘後分路進攻四面合圍逆首僞潮王黃子澄父子率黨六七萬人負嵎死守李鶴章督軍環攻晝夜不息並分兵堵截宜興常州援賊十一月初一日周盛波郭松林等燒燬賊船百餘隻攻破惠山石卡二道擒斬悍賊二千餘名是

夜李鶴章令丁日昌手燃三眼開花礮焚燒賊屋數處乘賊慌亂督率張樹聲等攻破亭子橋口頭營一座殺賊數百名初二日官軍連破東北南三門賊營十餘座奪獲賊船甚多又破其西南二營李鶴章見城上賊漸移動令郭松林吳建瀛黃翼升分飭水陸各軍奮勇齊進一擁登城賊衆下城巷戰黃逆自率老賊五六千人逃出北門經周盛波擊斬二千餘級逆衆轉由西門而遁周壽昌督隊截殺斷其去路逆衆衝突十餘次周壽昌縱馬手擒黃逆餘賊追斬殆

盡潮逆之子亦經郭松林擒獲共計生擒大小賊目五百餘人擒斬溺斃二萬餘人救出難民三萬餘人當將無錫金匱縣城克復

蘇州軍攻克常州城外賊壘並敗句容援賊

劉銘傳進攻常州由城北陳渡橋羊頭橋間道進剿越過圩塘賊壘十月初九日進紮西施橋孫村等處時周盛波張樹聲已出東路攻奪白家橋賊卡十三日統領知府李鶴章由無錫至令各軍滾營前進十四日先破圩塘賊壘賊勢披靡二十日句容僞童王

合衆五六萬來援鶴章仍下令分攻各門以綴城賊
而自率九營禦之鏖戰竟日援賊方退我軍又別出
奇兵繞至其外攻城之師進破南門賊營四座逼紮
城根賊勢益蹙

鎮江軍陣殲丹陽句容首逆

十一月二十四日僞忠逆之子勾結句容悍賊僞岡
天義黃逆率賊匪二三萬衆分道撲犯鎮江甘棠橋
官軍營壘勢甚兇悍馮提督子材等督飭諸軍分投
設伏迎勦逆衆數十騎誘敵官軍屹不少動逆首岡

天義率洋槍隊直撲陣前副將楊青山整隊以待見賊逼近開放排槍連環轟擊勢密如雨逆勢不支紛紛倒地岡天義黃逆中槍墜馬經馬步軍衝入陣中割取首級餘匪奔潰官軍分路抄擊斃賊無算逆衆遁回丹句各城

蘇州軍收復浙江之平湖縣乍浦汎海鹽縣澈浦鎮並攻克平望鎮等處賊壘收復浙江嘉善縣

浙江嘉善縣與江蘇婁縣接壤而城東張涇匯尤當其衝我軍既克蘇州劉秉璋潘鼎新督兵越境會勦

十一月初四日克張涇匯以爲圖浙根本先是平湖賊首乞降請爲內應鼎新等分道進兵而別屯兵於鍾埭以拒嘉興援賊十月初八日水師逼城下賊反戈自攻開門迎師陣斬洗天安等巨酋而同時乍浦等處亦乞降初五日鼎新督師疾至乍浦攻克東門外牛橋賊壘十二日收復乍浦汎城十三日收復海鹽縣城十四日收復澉浦鎮孟河汎二城均分兵駐守李巡撫因其地去蘇州太遠而賊衆仍舊聚於江浙之交平望等處乃令鼎新等自爲應援而檄程學

啓速攻平望以制賊二十二日程學啓李朝斌督率
諸軍進攻分其軍爲三道水師由汾湖兜勦而別遣
軍屯梅堰橋防湖州之賊時平望南北岸賊有石城
土壘二道我軍方悉力猛攻逆衆突出二三千人抗
拒陸軍併力擊退復於次日分路進攻忽嘉興突來
援賊萬餘李朝斌等分兵進勦併力夾擊程學啓督
兵連開炸礮轟斃悍賊多名立破賊匪左壘李朝斌
督率將士由河南附堞而登副將龔生揚等由河北
蛇行而前各破石壘一座總兵王永勝等率勇填濠

拔樁一擁而上復將賊壘二座攻破其竄逸者悉爲
檣船截殺尸骸山積共計擒斬賊目二十餘人悍黨
四五千入燒燬賊船五百餘隻奪獲大礮六十餘尊
火藥五千餘觔礮船民船百餘隻旂幟器械無算追
殺數十里復擒斬數百名淹斃尤衆黎里之賊望風
狂奔復破賊營三座二十四日一鼓下之時嘉善守
賊聞平望已克懼而乞命李巡撫令程學啓往圖之
二十七日收復嘉善縣城我軍之進攻平望也賊尙
壘犯海鹽平湖取道沈蕩新豐鎮潘鼎新等軍力禦

之殲賊殆盡

浙軍攻勦杭州餘杭陣殲首逆

杭州餘杭之賊屢爲官軍痛勦復於長橋女兒橋等處糾添悍賊疊次來犯均經官軍擊退其杭城踞賊乘霧直撲官軍營壘水陸各軍分投勦擊鏖戰雨時賊大潰左總督於馳抵富陽後分飭各軍進勦餘杭逆匪悉衆來撲擊斃數百名逼水淹斃者無算城賊拚死抗拒蔣益澧等軍三面蹙之賊尸枕籍僞歸王邵光明被礮轟穿左脇立斃計陣斬黃衣等悍賊五

百餘名驍銳約千數百杭城逆匪聞風恐懼蔣益澧
派令記名提督高連升洋將德克碑等會同水陸各
營進攻鳳山門外破賊九壘逐北直抵城隍山腳斃
賊二千有奇

十二月蘇州軍擊退援賊奔牛解圍

上月我軍疊克常州賊壘奔牛鎮等處守賊乞降十
三日常州賊出圍降衆各營孟河賊亦西至道員馮
席珍擊退之十四日進克孟河汎城時唐殿魁黃桂
蘭屯奔牛以扼丹陽之賊十二月初逆首偽章王等

糾集悍黨竝用忠逆所購洋人飛而復來輪船圍我
奔牛鎮營盤日以炸礮轟我營又增築堅壘數十勢
甚迫時奔牛旁境如孟河汎石橋灣羅池涇皆陷十
二月初二日劉銘傳抽攻城之軍二千人欲突圍入
援賊出隊迎拒以無援未得達殿魁遞帛書告急初
七日銘傳與郭松林自將三營馳往途中皆賊壘且
戰且行李鶴章又調槍隊兩營繼進爲應而李秀成
李侍賢陳坤書復由金壇溧水等處添賊數萬四面
環紮賊壘期逼奔牛以解常州城圍十二月十三等

日李巡撫派令李鶴章分撥將弁三路竝進繞赴李士橋與銘傳軍會十四日劉銘傳督率董鳳高畢乃爾等以小炸礮轟陷李士橋頭營郭松林由上游攻賊東南黃中元滕嗣武由下游攻賊西南犄角而進密飭奔牛守營之唐殿魁等衝出夾攻賊衆拚死迎拒我軍鼓勇猛進槍礮齊發先破東南賊營聚殲其衆西面賊營亦皆驚亂滕嗣武乘勢縱擊賊衆奪門狂奔官軍由後路追擊砍斃無數對河各大股逆賊亦經滕嗣武等擊退開礮燒死賊匪多名將飛而復

來輪船焚燬劉銘傳督隊向奔牛猛衝賊又分股數
萬繞後圍撲郭松林等折回復戰賊衆驚潰各鳥獸
散不及歸巢向丹陽一路遁去我軍分路阻殺追擊
十餘里連破賊壘三十餘座斬賊萬餘擒獲賊匪數
百名奪獲旂幟器械無算奔牛之圍立解

平定粵匪紀略卷十七

同治三年甲子正月陝西軍克復漢中府城竝截勦中
橋賊匪

髮捻各逆陳得才等上年八月踞漢中府因金陵圍
急洪逆遣諜約令回援於十二月間傳僞令率在陝
各路逆黨東下陝西劉巡撫蓉偵知派令記名提督
何勝必蕭慶高等督兵急攻正月初十日破法慈院
賊巢斃賊四五千名十一日會堯曾克勝等由牟家
壩進擊油房街賊壘斬馘二千餘名各軍直薄漢中

府城逆首聞大兵雲集卽圖出竄官軍乘其慌亂斬
關直入四路掩殺搜斬一千餘人當將府城克復逆
衆向東北奔逸其中橋逆匪竄往城固一帶與踞逆
合股亦經官軍連日在牟家壩木家壩等處節節進
勦復殲斃數千名逆衆復竄撲陝廳又經參將謝
正球等擊退

逆首李侍賢陷安徽績溪縣旋經官軍克復

僞侍王李侍賢勾結僞堵王黃文金及廣德餘黨於
正月初二日由甯國上竄初六日陷績溪縣進踞雄

路孔靈等處意圖直撲徽州初八日總兵唐義訓率師自徽州出紮吳山舖俄有紅衣賊酋帶隊擁至我軍列陣迎戰斬執旂賊數人唐義訓乘賊稍卻催軍逼勦盡毀雄路賊館賊衆退走回顧各山逆旂展動恃援轉鬪各營奮力猛擊斬馘無數適閩浙左總督自屯溪馳至唐義訓與之會師進攻初九日王開琳自臨溪驅賊至七里牌直抵城南賊遽返走入城唐義訓麾兵夾擊斜入城西賊由東西兩門遁出立將績溪城克復馳剪尾股而還

浙軍收復紹興府城克復諸暨蕭山兩縣

紹興被陷後道員張景渠統兵會同英國總兵佘樂德及權授江蘇副將達耳第福之軍進攻達耳第福以銳進陣亡正月十九二十等日景渠等與賊戰於下方橋安昌塘均獲勝逆衆節節敗退江蘇李巡撫以洋將德克統達耳第福之軍會同景渠等四面攻圍屢戰屢捷東路賊卡悉下竝斷蕭山援賊城賊楊應柯約期內應二十五日三更城中火光四起逆首周姓潛逃次晨應柯開門迎降我軍一擁而進立將

紹興府城收復先是諸暨縣民團趙春林等探知城中踞逆僅五六千名因率同投誠之方蒂桂等分路環攻遂於二十二日將諸暨縣城克復殺賊無數逆黨何文慶率衆回撲官兵民團合力擊走之時景渠既復紹興立調各軍追勦由安昌塘柯橋進攻二月初二日抵蕭山城下賊猶閉門困守我軍奮力攻擊盡斃守城之賊緣梯而上立將蕭山縣城克復

浙軍收復桐鄉縣

浙江桐鄉縣城爲杭州至嘉興要路布政使蔣益澧

飭令蔡元吉乘夜潛師進攻復令李邦達等各率所
部分紮桐鄉東北兩門僞朝將何培章見官軍雲集
勢已窮蹙潛通欵於都司張其光於初六日隻身赴
張景渠營中乞降呈繳軍械僞印景渠許之卽於初
八日收復縣城

陝西軍大破上元觀賊壘連克城固洋縣二城

陝軍旣克漢中逆衆分路竄逸各軍乘勝躡直抵
上元觀賊壘正月十六日何勝必等分隊設伏誘賊
出巢縱兵兜擊截殺逆匪千餘人乘勝拋擲火彈將

逆壘一律焚燬餘賊向城固縣逃竄何勝必復會同
劉岳曙等軍渡河追勦直抵城下先將附城賊壘燒
燬蕭慶高等率隊奮力進攻梯城躍入賊衆驚潰紛
向東南奔竄官軍斬馘甚多當將城固縣城克復蕭
慶高等復乘勝進逼洋縣分路環攻竝潛遣精銳入
城設伏乘夜舉火爲號各軍奮勇登城呼聲動地逆
衆驚亂自相踐蹋官軍四面圍勦賊尸山積餘賊突
出東門向華陽一路竄走復將洋縣城池克復

蘇州軍攻克宜興荆溪縣城

逆匪占踞宜興荆溪縣城李巡撫派令郭松林等各營會同戈登李恒嵩進勦統領李鶴章又令楊鼎勳率隊合擊正月十九等日戈登派洋將美叙羅殿至宜興城外察看地勢郭松林等帶隊直抵城下揮隊痛勦將近城各賊卡先行燒燬逆衆開城出拒官軍分路合勦擒斬多名郭松林被槍子擊穿右肘膝嗣武右骹亦傷弁勇間有傷亡二十一日常勝軍進河東松林等陸軍進河西水師溯流而上二十二日各軍屯三里橋常勝軍攻東門郭松林等裹創再戰敗

賊於上湖橋正得手間僞代王黃精忠由張渚達西
沅率黨來援拚死相撲我軍屹立不動但以洋槍排
擊逆衆死傷相繼尙無退志吳勝清等三路包抄逆
衆四面受敵勢漸不支各軍勇氣倍增殪賊甚衆賊
始奪路狂奔追殺四十餘里毀賊船千餘隻旂幟器
械無數援賊旣敗城賊之勢愈孤戈登督礮隊攻東
門滕嗣武等分攻北西南三門四面攻打愈逼愈緊
水師入東西沅截竄賊窮賊開西門而逃戈登與郭
松林等併力追殺竄逸無多餘衆泣涕求降於正月

二十四日將宜興荆溪縣城克復

蘇州軍壘克嘉興城外賊壘並敗湖州援賊

程學啓進規嘉興築壘北門壘有斬獲劉秉璋潘鼎
新營盤分紮朝陽橋等處時東北門賊壘尤多正月
二十四日學啓議分兵五路進攻城賊出援學啓率
親兵由小西門繞城河以截賊之後隊賊驚駭卻顧
我軍乃攻破小西門北門賊營七座擒僞天將劉得
福慕天義賈慕仁斃悍賊千餘奪大礮五十尊而分
攻旁路之軍壘克秋涇橋吳涇橋合歡橋等處賊壘

東北門之賊殲除殆盡時湖州賊屢竄南木壇並四
亭子新塍思犯盛澤平望以圖嘉興經淮揚太湖水
師敗之學啓乃督各營逼城興築礮臺二十八日學
啓督飭諸軍猛攻礮裂城垣十數丈城賊拚死抵拒
燃傾火藥下擊總兵何安泰等中槍陣亡未能得手
湖州賊又犯盛澤圍王江涇後路營盤學啓派兵堵
截敗之

江甯陸師攻克鍾山天保僞城扼斷太平肅策二門遂
合城圍

金陵一城延亘百餘里自浙江曾巡撫國荃駐師雨花臺以來奪取附城諸要隘東西南三面悉爲我有惟東北鍾山賊壘未克城北兩門未合圍終不能制賊之命曾巡撫商之福建水師楊提督岳斌飭派師船絕江面之接濟又派總兵朱洪章等繞過鍾山之後分夜輪轟扼陸路之接濟復調駐守金柱關之總兵朱南桂助圍金陵正月二十日夜截殺句容護糧之賊甚多二十一日曾巡撫親督各軍至洪山北固山神策太平等門外詳勘形勢適忠逆李秀成先糾

大股猛撲嘉字營濠牆朱洪章等見賊抵死來犯率
隊出濠夾擊賊乃返走上山鍾山之巔有大石壘偽
名曰天保城各將弁攀巖直上火毬火箭從壘後直
入賊多冒火突出遂將偽天保城克復二十四日我
軍在太平門外新築二營派湘後左右營守之維時
總兵梁美材所部紮洪山朱南桂所部紮北固山堵
住神策門大路自此援賊不得入城守賊不得出而
金陵城北之圍始合

粵匪勾結皖豫各捻同擾楚邊楚軍分勦被圍於霸山

旋獲大捷

陳得才等欲援金陵豫結皖豫各捻令同竄楚邊議於河南南陽湖北襄陽會齊台股下竄皖捻王庭幹一股及苗沛霖餘黨苗添盤等先於上年十一月由信陽州竄湖北隨州之小林店天河口等處官大臣等飭派總兵趙克彰等擊退於十二月初三日竄桐柏之平市鎮初九日豫捻陳大漭一股由盤古山擁衆南趨與王庭幹會合約衆十餘萬竄入棗陽縣境本年正月二十四日總兵趙克彰王桐柏營總保升

烏勒喜布統率馬步在棗陽縣之霸山會勦被賊圍困提督成大吉由德安先帶馬隊往援衝入營中亦被圍裹維時賊壘賊館如櫛如壩我兵劈鞍以炊殺馬以食而軍氣堅忍不衰當經總兵楊朝林由棗陽縣之草店馳往成大吉趙克彰王桐柏各密調在外分防各步隊腹背夾攻斃賊三四千名焚賊壘館一百餘處於二十九日解圍其藍二順一股由山陽竄入湖北鄖陽之上津堡道員梁作楫知府唐協和等會勦於正月二十一日收復上津賊分二股竄泗峪

河大壩口等處

二月蘇州軍攻克浙江嘉興府城

程學啓之軍進逼嘉興賊之城守甚固官軍多傷亡
又遇雨不能進攻時沿江竄賊方警學啓思亟復嘉
興抽兵西援乃繕攻具修礮台以圖猛進十五六日
分門攻擊賊拚死抗拒乃督勇丁縛草膝行增築月
牆以護礮環攻不息十七日學啓督所部用洋人備
雷巨礮轟塌城垣百餘丈擊毀礮台二十餘座賊爭
負土填城闕學啓揮旂督衆詭欲登城俟賊益衆乃

燃礮發輒斃賊數百連夜督親兵成浮橋二道以濟
師十八日湖州賊自新塍來援學啓別遣兵擊走之
學啓乃會同李朝斌等奮力攻打督隊乘城城頭矢
石如雨程學啓奮不顧身親率勇士大呼殺入衆隊
繼進城上逆尸枕籍猶有悍賊二三千人排槍抗拒
程學啓肉薄以登致受槍子傷部將劉士奇等見主
將受傷各捨命率隊登城縱橫擊刺賊衆紛紛潰散
各軍整隊而入將守城悍逆圍殺淨盡遂將嘉興府
城克復學啓傷重歸蘇州旋卒學啓安徽懷甯縣人

曾巡撫圍皖時投誠疊著偉績曾大臣派隨李巡撫
至上海所向有功及卒李巡撫哭之慟奏請照提督
陣亡例優卹

予謚忠烈原籍及死事地方立專祠

收復溧陽並解江陰常熟之圍

自克復宜興後進圖溧陽郭松林等沿途獲勝埽蕩
而前直抵溧陽縣境聲威大振逆衆膽寒賊目吳人
杰等率衆投誠當將縣城收復郭松林拔隊攻金壇
將城外賊壘賊卡一律埽平是時常州賊陳坤書方

合丹陽句容之賊十餘萬由西路繞出常州城北日
犯我軍統領李鶴章督劉銘傳況文榜等軍擊敗之
賊覘圍城之師無隙可乘乃圖竄擾腹裏二月初五
日賊循江岸犯江陰之南廂初十日犯常熟縣城十
一日犯福山於是江陰無錫三城皆警蘇州以西大
震李巡撫飭常州諸軍堅守勿戰飛檄郭松林等倍
道援常熟增調蘇州嘉興各軍助守令李鶴章守無
錫而分兵至江陰截賊歸路時賊以常熟守固乃趨
無錫鶴章登陣督守力戰卻之而分犯江陰之賊又

爲守將駱國忠等所敗賊乃竝犯常熟北自楊舍福
山南自顏山王莊數十里皆賊提督黃翼升方返自
江北十四日自督三營由白茅口馳入常熟會同鄭
國魁李昭慶等軍於十六日竝出東北門擊賊郭松
林援軍復至夾擊之賊出不意大驚怖我軍乘勝疊
克王莊顧山陳市賊壘追殺二十餘里賊仍由大河
回撲常熟水師截擊之賊首尾不能相顧掩殺無算
十七日我軍追賊至劉家橋福山常熟圍乃解

江西軍克復金溪縣

髮逆分股竄江西疊經官軍沿途截勦賊匪敗竄闌入金溪縣城道員席寶田由安仁帶兵馳援分路攻擊乘勝埽蕩前進直逼城根悍賊萬餘出城抗拒官軍奮勇衝突賊勢不支另股由城東繞出欲抄我軍後路均經擊退遁入城中席寶田督飭全隊併力攻城賊衆膽落奪門逃遁官軍四面截擊斬馘無算立將縣城克復

浙軍克復杭州省城並餘杭縣

杭州餘杭兩城踞逆經官軍於二月二十一日攻勦

獲大勝洋將德克碑在饒頭山開放大礮轟塌鳳山
門城壕三丈餘賊勢極爲窮蹙蔣益澧復親督水陸
各軍於二十三日乘勝奮攻慶春艮山等門晝夜不
息賊膽愈寒是夜五更急啓武林門向德清一路竄
走蔣益澧督隊四面梯攻入城殺賊數千名卽於二
十四日卯刻將杭州省城克復餘杭之賊同日由東
門逃竄經左總督豫飭各營整隊以待是日見城中
火起各營分路躡蹤追剿餘匪敗竄瓶窰鎮當將縣
城收復

西安將軍多隆阿克復盩厔縣受傷旋薨

上月陝軍攻克洋縣其踞逆爲藍大順同治元年四月與粵逆通上年十月初九日竄陷盩厔縣留黨逆分守洋縣多將軍隆阿蕩平全省回匪卽於十月十三日親至盩厔縣督攻藍大順百計守禦未得迅克本年二月二十三日開挖地道轟開月城丈餘將軍率副都統穆圖善總兵姜玉順等一擁而登詎城內尙築堅卡五道正力攻間將軍頭目受槍子傷甚重忍創回營諸將官欲趨視將軍傳令此城速克傷重

亦可痊如不乘城雖輕亦不欲復活請將聞令益奮
努力再戰是夜露立雉堞不復收隊二十四日環攻
竟日至三更時穆圖善傳令三面緊攻於黑暗中向
東面填濠拔椿梯繩先入四路齊進克復縣城首逆
藍大順率數十人乘亂竄出至新口峪復裹脅二三百
百人欲竄甯陝經佛平縣團練截勦殺斃二百餘人
有死黨十餘人昇之翻山狂奔至漢陰界爲在籍主
事管湧帶練殺斃生擒逆黨李登福王老么等送往
漢陰廳驗明藍大順首級餘匪均正法按藍大順自

咸豐九年在雲南昭通府倡亂與李短搭搭等蹂躪全川爲駱總督埽蕩據生擒之李短搭搭供指藍大順已死於亂軍中後甯洋縣者爲逆首曹姓多將軍疊次疏報均指爲藍大順蓋毋論藍與曹至此已殲厥渠魁矣將軍傷重至三月二十三日薨於整屋軍中將軍由黑龍江馬隊從征皖楚身經千百戰所向有功料敵之神罕與倫比同治元年秋銜

命入秦閏八月初一日以親兵七十餘人解商南之圍初二日至初七日調四營勁旅破另股賴毫捻匪姜台

凌等五六萬之衆伏尸四十里山前巨壑窮不見底
人馬層積填與路平

恩諭云以少勝多可云奇捷平時愛士卒如骨肉而威令
嚴明凡所指揮湯火不敢避薨之日三軍雨泣天下
識與不識皆痛惜之方受傷時

上發內府珍藥敷治竝

命黑龍江將軍傳知其子雙全馳驛往視而多將軍無家
其子依居親申身無完衣黑龍江將軍憐駭資以行
裝始得馳往已不及見其公而忘家如此遺疏有云

云不使家有長物身有餘財非虛語也

三月浙軍克復武康德清石門三縣

浙省官軍克復杭州餘杭後餘匪分竄武康德清等處左總督派令楊昌濬蔣益澧等分路進攻羅大春先將黃桐橋浮橋折毀密飭各營分伏武康賊壘之外火器轟擊逆匪大震三月初四日羅大春等各率所部薄壘環攻逆首吳海勝憑卡抗拒降人楊芸桂等開門迎納官軍吳海勝逃至二橋埠地方復率援賊回鬪官軍排礮轟擊斃賊無數當將武康縣克復

德清一城經高連升等併力猛攻自辰至未鏖戰四時之久賊勦不支棄城而遁官軍分路追殺擒斬悍賊數百名奪獲船數十隻器械無算德清縣城亦卽收復蔣益澄復飭知州李邦達等進逼石門踞逆邵光明出城就撫遂於初五日收復石門縣城道員李耀南等並將圖竄孝豐匪股迎頭截擊斃賊無算救出難民數千名

鮑軍攻句容生擒僞王項大英等勦平寶堰賊壘浙江提督鮑超東壩之師久無戰事曾大臣檄令進

取句容丹陽一帶踞句容者爲僞守王方海宗聞我軍將至卽在金壇寶堰等處糾結僞翰王項大英僞列王方成宗兩大股同守句容城希圖抗拒三月初五日鮑提督各軍冒雨疾馳攻破三岔山之賊於初六日次句容所屬之塔岡結寨未成賊已突出四五萬人悉銳來撲卽分三路迎敵搏戰數時參將黃海清等各率騎隊越過田隴直抄賊後總兵婁雲慶更以步隊佐之賊見歸路將斷大譁欲遁我軍直逼城下殲賊數千附城四壘亦卽一開散去鮑提督令各

營徹夜環攻漏至四下忽見城東一角火光燭天知
內亂已作急引軍東向而賊已啓南門出衝各將士
乘勢勦殺並縛二酋以獻俄有徐本邦等內應七人
叩馬通報指所擒二酋曰此僞翰王項大英僞列王
方成宗也遂卽正法於初七日克復句容縣城距城
四十五里曰寶堰南通金壇北達丹陽逆首方海宗
遁至彼處與壘賊僞顯王袁得厚合謀阻進兵之路
初九日鮑提督率隊進攻賊堅閉不出我軍負草填
壕爭先躍入一壘既破衆壘盡靡殲戮無算方逆袁

逆往金壇丹陽遁去

蘇州軍兜勦楊舍一帶竄匪沿江腹地肅清

前蘇常等處竄匪撲犯江陰縣城已經官軍力戰解圍餘賊大股屯踞楊舍周莊華市等處夾山爲營蔓延甚廣李巡撫親赴江陰長涇察賊勢督戰甚亟飭道員張樹聲等軍四面環紮分路進兵先攻華市賊壘三月初六日劉士奇等督軍抄入賊後槍礮環施賊陣稍卻各軍拔樁踰濠一擁而進逆衆潰亂狂奔官軍追殺四十餘里賊尸枕籍自華市至樹山賊壘

百餘處一律埽平其奔逸之賊復經江陰北路之軍截勦李巡撫馳赴青陽親督各軍兜勦楊舍踞逆逆衆惶懼南奔與華市周莊敗賊併歸雲亭一路先是初四日賊聞東路官軍至分賊萬餘馳赴三河口設浮橋營壘以爲竄賊援應至是賊至雲亭欲由三河口浮橋回竄初七日我軍列陣南關進勦別隊由花山繞出賊前賊衆棄壘渡河我軍斷其浮橋四道溺斃賊中人馬甚衆竝將賊壘截爲數段擒斬無算旋又將三河口賊營攻拔其未過河之賊陷入圩中棄

械乞降數以萬計其已過河之賊經各軍前後夾擊
痛加斬馘賊因歸路先斷子藥俱盡大半徒手受縛
所擄百姓米糧衣物概行拋棄我軍取得仍以散給
窮民統計各軍俘獲近二萬人解散約有萬人餘匪
二三千人分向常州丹陽竄逸沿江腹地一律肅清
蘇州軍壘克常州城外賊壘

李巡撫旣克嘉興移軍進規常州時常州城西賊連
營二十里以通丹陽金壇之路三月十四日我軍於
城東南出隊綴賊劉銘傳攻西北六營盡破之十五

日李巡撫令郭松林等移紮城西南別遣王東華率水師進太湖十七日松林等攻陳渡橋賊壘賊槍傷楊鼎勲胷猶揮將士格鬪松林繞擊賊後乃破其營餘十營竝潰鄭國魁方營新插設浮橋濟劉銘傳之軍王東華水師由三河口會勦兩面夾擊復蹋毀河干賊營二十餘座於是賊西竄之路遂絕十八日各軍分道破小南門西門賊壘敗賊紛紛入城城賊恐我軍躡其後閉門拒不納殲戮無遺二十二日我軍合圍礮裂城垣數十丈勇士梯而登賊黨拚死力拒

搶堵壞城火藥與磚石並下未能得手天復雨乃罷
攻是時鎮江之軍進丹陽沿江孟河圩塘魏邨螺蛳
灣方家橋等處之賊萬餘先後繳偽印薙髮降悉遣
散之

鮑軍收復金壇縣

鮑提督既取句容遂平寶堰五壘彼處東北有丹陽
東南有金壇賊方分踞以與常州相犄角丹陽一路
有鎮江揚州兩處防軍攻之鮑提督遂督所部攻金
壇三月十二日渡河競進將欲壁於城下俄得鎮營

廣西馮提督來函以丹陽賊勢熾重商令移師助勦
鮑提督卽派總兵婁雲慶留金壇城外而自回句容
旋奉曾大臣飭令力保東壩之檄十九日飛馬傳知
金壇各營盡行撤回甫經傳令轉念撤營之時恐城
賊追躡我後或致疏失遂親率全隊偃旂息鼓於二
十日折回金壇之西洋邨設伏於茅山一帶備擊出
巢之賊金壇逆聞官軍撤隊果糾城賊二萬餘悉力
窮追鮑提督飭各軍伏於山後屏息不動俟賊追過
茅山催動號鼓伏兵齊起旌旂滿山賊不虞遇伏倉

皇急退各軍追殺五十餘里逼至金壇西門敗賊不敢進城而城賊亦啓南門遁走我軍躡蹤追勦復敗丹陽小路竄出之賊卽於二十日收復金壇縣城蘇州軍截勦金壇竄逆獲勝

鮑軍收復金壇縣敗賊料約二三千人屯踞南渡東北小山大股則自山下行走意圖肆擾經李巡撫所派道員吳毓芬等於三月二十日設伏誘賊斃賊數千逆衆退入南渡西南之小蜀山等處二十五日僞直王林得英約會常州西路孟河呂城各賊欲由金

壇歸併廣德同至南渡占踞吳毓芬吳毓蘭督兵由
山腹出招仙橋令羅義勝礮船扼南渡而自率陳占
榜余嘉鰲陸軍銜枚疾出正道分隊圍賊卡時方二
鼓賊睡正酣悉斬之營賊乘黑出竄四山鼓角亂鳴
賊衆驚愕我軍槍礮疊舉應聲而斃逸賊至招仙橋
遇毓蘭軍迎頭截擊復斃無算吳毓芬會同吳毓蘭
羅義盛各軍分三路進攻槍礮齊發應聲而斃餘匪
紛逃二十六日追至丁上橋等處四面兜裹逆衆棄
械受誅伏尸數十里斬僞直王林得英及秣天安黃

有才等於陣餘匪殄滅殆盡解散難民三四千人奪獲衣糧馬匹槍械無數

江西軍攻克新城縣合兵圍南豐

逆匪竄江西疊陷南豐新城兩縣提督黃仁翼等督兵進取新城於大漢嶺殲匪前鋒二三百名賊隊箇集猛撲營壘官軍從左右兩路抄出賊後縱橫夾擊羣賊披靡斃賊四千餘人生擒七十餘人各營進逼賊壘至東北兩門由城關處奮勇衝入城賊壘賊一時俱潰殺賊二千餘人生擒八百餘人當將新城縣

克復追賊於樟邨枯林橋等處疊有斬馘餘匪由邱
家隘竄入福建建甯縣境其竄踞南豐之賊經席寶
田韓進春等軍分路併進擊賊八都圩后竹等處埽
蕩而前斬其僞倍天侯張在朋一名橋皆太坪嶺之
賊向水南楓嶺與僞天將林正揚合力抗拒我軍併
力合擊羣賊棄壘狂奔哨長蔣懷清以洋槍擊林逆
墜馬殲其步賊數百城賊悉銳出撲官軍分左右包
抄賊陣大亂殺斃無數追至城下四面合圍

湖北敗捻復竄襄樊與漢南粵匪合股

霸山解圍後擒衆復竄襄樊安襄鄖荆道歐陽正甯
水師副將龍藻琦接戰小挫經總兵梁洪勝與成大
吉等率隊馳援痛勦獲勝襄樊賴以保全敗擒分竄
河南浙川廳所屬之李官橋鄧州所屬之厚坡適漢
南粵匪由浙川內鄉鄧州各邊界下竄於三月十九
日在李官橋合股令擒匪前驅前隊至棗陽縣西之
隆興寺尾隊尙在內鄉鄧州等處賊衆數十萬蔓延
數百里官大臣於四月初三日出省督師咨調多將
軍帶往陝西之總兵姜玉順藍斯明等軍回楚以厚

兵力

四月蘇州軍攻克常州府城生擒首逆

江蘇常州踞逆僞護王陳坤書等擁衆死守賊取舊
棺敗船堵城闕我軍進攻則發槍礮以拒李巡撫令
軍士築長牆百餘丈以爲障蔽掘溝於其下伏兵二
千人夜中乘賊不覺搶造浮橋初四日成浮橋六道
時久雨不霽李巡撫默禱於神初五日雨稍止洋將
戈登以礮隊攻南門常勝軍多傷亡不克登乃改令
提督郭松林總兵楊鼎勳督軍攻西南而常勝軍應

之提督劉士奇王永勝攻東南而張樹聲軍應之劉銘傳之軍獨攻北門初六日日方中天大霽水陸礮聲如雷舊擊之城復傾數十丈賊仍悉力抵禦李巡撫親督各軍四面環擊屋瓦皆飛斃賊甚多各軍同時奮勇登城逆衆率悍黨數千拚死抗拒劉銘傳等揮軍直進將陳逆大股逼入街心節節追勦賊尸沿衢塞巷追至護逆住處猶紮石卡以槍礮對擊官軍圍之數重殺傷無算龔生陽突入擒僞護王陳坤書周盛波擒僞列王費天將縋而逸者數百仍截殺之

棄械跪降者數萬人其潛伏城內悍賊悉數殲戮無
得脫者初常州城於咸豐十年四月初六日未刻失
守越四年同日克之併時刻亦符捷聞

優詔給賞有差

僧王督師入楚在隨州會擊髮捻各逆獲勝

官大臣出省督師水陸合擊於棗陽及京山所屬之
朱河鍾祥所屬之板蹬岡壘獲勝仗僧王勦辦張總
愚捻股由河南之鄧州新野入棗陽縣境四月初四
日至隨州帶同楚軍總兵楊朝林攻勦僧王親率馬

隊由隨州東西兩門包抄楊朝林督率八營由北而南一鼓齊進鏖戰四時之久衝突二十餘次賊始向東敗退追逐二十餘里殺賊一千餘名正值河水泛漲溺斃者一二千名總兵梁洪勝擊安陸府屬之賊於舊口獲捷殺賊數千名時河南張巡撫之萬於信陽州等處會截髮捻亦獲勝仗

鎮江揚州官軍會克丹陽縣城

廣西馮提督子材督軍圍攻丹陽揚州富將軍明阿派記名提督徐州鎮總兵詹啓綸助之逆衆屢次傾

巢出撲詹啓綸等以開花礮斃賊五百餘名陣斬僞
法天安鼎天安賊首二名四月初八日官軍斬關而
入逆首陳玉成之叔僞烈王陳時永等率衆拚死巷
戰官軍奮力迎擊斃賊六七千人陣斬各僞王及僞
義安福燕豫等逆目竝生擒洪秀全妻弟僞來王賴
桂芳等遂將丹陽縣城克復

東壩防軍擊賊獲勝

自丹陽克復後僞顯王僞甘王等巨酋糾敗賊三四
萬衆由天皇寺進竄大山頭一帶以圖犯我東壩竝

分股由漆橋進竄塘溝以圖犯我高淳四月十三日
水師營官柳壽田進擊於固城湖敗之遂約高淳守
將蕭信集追擊於楊邨又敗之賊大懼遁回漆橋復
歸併大山頭一股合竄東壩十四日總兵譚勝達等
蓐食出隊師次安興適見賊旂林立迎面撲至諸將
士燃槍環擊賊無懼志猛鬪十餘次勢甚剽悍譚勝
達卽於敵騎衝突之際橫躍入陣立梟數酋賊氣爲
奪其左路之賊亦爲我軍所敗乘勢追過右路而右
路聚賊尤衆擁護一首營官邵訓誥策馬突出斬之

各路譁亂欲遁各營併力長驅勢不可遏甘逆顯逆正在高岡督戰我軍一擁而上亂鋒交下賊乃大潰逐出三十里共斃賊七千人中有僞王十七人餘賊向廣德竄去

江西軍解玉山撫州之圍浙江援軍敗賊於弋陽

逆匪先圍玉山縣經副將劉明珍等陣斬珊天安等斃賊三千有奇香河林屯一帶逆壘亦經河內水師及樂平練勇擊退四月十五等日侍逆悍股越金溪犯許關繼犯撫州之河東灣猛攻東門均爲按察使

劉于濬督飭各軍擊退逆衆復敢輪番誘戰營官黃
名揚等據橋守卡發礮斃賊無數護南贛鎮總兵曹
承忠撫州府知府吳祖昌等於城上連轟巨礮逆衆
計窮而遁十八日復突起攻橋環呼城中內應冀亂
我軍劉于濬飭列陣以待俟逆撲近槍礮並發斃賊
甚多餘匪遁向金溪而去撫州城圍立解僞列王林
彩新由浙江竄至江西弋陽縣境浙軍道員王德榜
督隊追抵湖西揮軍抄擊斃賊無算敗竄黃沙港對
岸楊家坡王德榜督飭各營約會江西水師分路齊

進奮力環攻逆黨從上游渡賊千餘來援各軍沿河
截擊將浮橋折毀竝擊沈賊船多隻賊殊死鬪官軍
鏖戰逾時逆勢始蹙落水斃者甚衆其南岸援賊亦
殲除淨盡共計殺賊千餘名生擒二百餘名救出難
民數千人奪獲騾馬槍礮多件

逆匪續犯徽州官軍截勦屢勝餘衆潰敗

僞侍王李侍賢等先後由浙犯徽由徽入江嗣報徽
州南路復有賊至詢其首目爲僞列王林逆僞鱗王
朱逆及僞爵潘忠義等究其來路蓋江陰楊舍之敗

賊常州城外之壘賊由丹陽湖州而上竄者也從昌
化進老竹嶺闌入歙境大埠等處距徽州三四十里
總兵唐義訓馳函告知前安襄郢荆道金國琛降補
知府毛有銘各以所部來會是夜唐義訓伏兵鍾塘
嶺後四月十一日以五營進遇賊接戰伏軍竝發殲
其前鋒是時金國琛毛有銘會帶各營行抵富塢隔
河而屯賊遽以大股衝列山岡上下我軍部勒既定
姑不出戰俟賊涉水將半突出奮擊更以騎卒沿隄
包抄適唐義訓尾賊而至兩面夾攻賊卽不支緣山

亂竄俘斬千餘人解散無算逸賊遁向黃山小路復於十一日爲唐義訓所敗十三日我軍向漁亭併進唐義訓爲前茅毛有銘繼之金國琛又繼之馳抵五弓橋賊已揚旂怒馬而來唐義訓先與交鋒金國琛毛有銘分路會擊大呼衝入斬尸塞流收軍少息忽齊雲山之麓衝出一股我軍再起破之是夜月色正明唐義訓派隊赴南渡循河直上處處埋伏比曉金國琛毛有銘亦率各營自五弓橋銜枚疾進賊正渡河我軍鼓角齊鳴各山伏兵突出羣賊驚亂不復成

伍未渡者衆軍蹙之入水已渡者爲伏軍所截生擒
林逆等十酋陣斬潘忠義等十四酋死者散者二萬
餘衆輜重器械拋棄略盡

平定粵匪紀略卷十八

同治三年五月蘇州軍擊退湖州廣德援賊克復浙江
長興縣

長興縣在湖州西毗連宜興溧陽及廣德州時湖州
賊方竄湖濱楊漣大錢口潘鼎新分軍屯南潯震澤
以扼其衝而賊猶恃長興爲聲援李巡撫因浙省函
商助勦乃令郭松林等率三十營由宜興進攻別遣
李朝斌等率水師入夾浦口又別遣水陸五營接應
鼎新軍五月初八等日官軍沿途疊獲勝仗鼎新軍

由南潯進紮吳淞水師乘風入夾浦代蘆葦填河破
賊石壘十一日松林之軍進抵長興毀城東上莘橋
跨塘橋賊壘逆衆以千餘人出城迎拒經官軍衝擊
殲斃多名湖州逆首陳逆及廣德四安賊首江逆各
率數萬人分路來援依山築壘綿亘林谷郭松林楊
鼎勳由五里橋擊湖州援賊王永勝自新塘口馳至
兩面夾擊槍斃斬獲數千人遂將鴻橋跨塘橋沿河
傍山賊壘一律蹋毀劉士奇由磨盤山直逼廣德四
安援賊各壘相持正力李朝斌太湖水師登陸繞出

賊背自山梁疾趨而下火器直燒賊營烟燄蔽天各軍分路勦殺殲斃溺斃者萬人將西北山沿山逆壘概行平毀官軍正擬乘勢攻城湖州廣德添撥大股折回意圖再逞郭松林等與淮揚水師劉士奇等與太湖水師分路馳擊乘逆衆喘息未定合力痛勦斃賊各數千人追殺二十餘里乃踉蹌遠遁官軍於西北兩門乘夜搭造浮橋城賊槍礮竝發哨官王備興中槍殞命張正全槍傷左臂仍復裹創督攻游擊劉玉龍在城北安設炸礮靠城轟打各軍分門逼攻縱

橫進擊五月二十四日轟蹋城垣十餘丈楊鼎勲督
隊渡河鼓譟而登賊以槍礮排聚關口拚命死拒總
兵高正魁等均被槍傷仍各裹創力戰李朝斌郭松
林劉士奇王勝勇各率所部三面緣梯直上賊不稍
卻郭松林率總兵宋德鴻首先衝入千總劉興隆繼
之各軍一擁齊登將城中悍賊次第擒斬其由西門
衝出之賊復經我軍殲斃無數遂將長興縣城克復
江西軍埽清貴溪賊壘

江西貴溪盛源洞等處之賊分踞小港一帶築壘修

卡經記名總兵孫昌國等督飭礮船駛赴黃土墩乘
夜開放槍礮逆衆倉皇敗竄暗中自相踐蹋水陸各
軍乘勝由黃土墩撲卡而入擒斬甚多逆大潰竄丁
家橋鷹潭等處復經王德榜等各軍分路追勦斬殺
數百人其退竄羅田岡上及鄧家埠等處之賊各路
官軍分投截勦共斃五百餘人逆衆搭造浮橋陸續
奔竄復經官軍追殺淹斃無數未渡之賊均經水師
轟斃解散賊匪尤多貴溪賊壘一律肅清

髮捻各逆南竄楚軍分途防勦賊竄下游

髮捻各逆自隨州及舊口等處擊敗分擾京山天門
應城各縣境竝踞皂市等鎮官大臣督諸將各路截
勦屢獲勝仗賊始南竄至孝感雲夢一帶護軍統領
舒保力戰陣亡賊復圍撲總兵石清吉楊店軍營經
石清吉二次衝圍力禦殺賊二百餘名遂竄往黃陂
縣之木蘭山一帶復擾及喬家店黃花滂等處距漢
口鎮僅十餘里經水陸各軍堵截前股既退後股復
至楚軍防勦兼施賊不能逞乃先後竄往下游

浙軍進規湖州攻克孝豐縣城

五月初十十一等日湖州踞逆由東南分撲長生橋
官軍營盤復潛軍偷犯各寨經蔡元吉等設伏迎擊
斃賊數百名生擒賊目三十餘名蔣益澄高連升復
派水陸各營助勦自十四日至三十日屢次獲捷焚
賊船十餘號將袁家匯賊壘一律毀平其南路賊匪
於五月初九日由太湖塘楊樓圖撲犯林圩何培英
乘其半渡擊斃多名劉樹元馳至夾擊逆衆敗竄我
軍乘勝追勦將太湖塘楊樓賊壘掃蕩淨盡其西路
竄踞孝豐之賊分犯百丈裏爲羅大春等擊退六月

初三日周廷瑞等潛師抵城劉端冕躍濠直入劉璈
營隊繼之城賊紛紛逃竄初四日遂將孝豐縣城收
復生擒偽咸王陳榮斃賊千餘陣擒長髮老賊二百
餘名救出難民五六百名

匪藍二順撲陝西省城將軍穆圖善留兵會剿

髮西安多將軍薨於蓋屋軍中

授西安副都統穆圖善爲荊州將軍接統楚軍奉

旨旋楚防勦所統三十營已飭總兵藍斯明姜玉順等率

二十一營先歸存九營未發初踞山陽縣川匪藍二

順於上年十月爲楚軍總兵藍斯明攻克藍二順竄
商州之二郎廟旋游弋於豫楚邊界復擾鄖西各處
本年二月多將軍克復整屋其踞逆藍大順爲二順
之兄託名復仇於五月五日率黨疾撲西安省城劉
巡撫蓉撥兵迎勦小挫賊已竄至子午谷距西安城
僅十五里多將軍文案委員湖北候補道王開福白
穆將軍謂雖未奉

旨勦陝賊而逆黨突至未可分畛城請以所存九營兵勇
協勦將軍然之遂會劉巡撫及西安將軍德興阿出

隊堵擊屢獲全勝至九月將全股撲滅穆將軍復奉
調赴甘肅會固原提督雷正瑄辦理西口軍務

六月金陵各軍克復江甯省城生擒僞忠王李秀成等
全股悍賊盡數殲滅捷上七月初一日奉

上諭本日官文會國藩由六百里加緊紅旂奏捷克復江
甯省城逆首自焚賊黨悉數殄滅並生擒李秀成洪仁
達等一摺覽奏之餘實與天下臣民同深慶悅髮逆洪
秀全自道光三十年倡亂以來由廣西竄兩湖三江並
分擾及直隸山東等省逆迹幾徧天下咸豐三年占踞

江甯省城潛稱僞號東南百姓遭其荼毒慘不忍言罪惡貫盈神人共憤我

皇考文宗顯皇帝赫然震怒恭行天討

特命兩湖總督官文爲欽差大臣與前湖北巡撫胡林翼肅清湖北上游胡林翼駐紮宿松一帶籌辦東征事務特授曾國藩爲兩江總督竝

命爲欽差大臣東征江皖號令旣專功績日著十一年七月我

皇考龍馭上賓其時江浙郡縣半就淪陷

遺紹三條諳切以未能迅殄逆氛爲恨朕以冲幼寅紹丕基祗承先烈恭奉兩宮

皇太后垂簾聽政

指示機宜授曾國藩協辦大學士節制四省軍務以一事權該大臣自受任以來卽建議由上游分路勦辦飭彭玉麟楊岳斌曾國荃等水陸並進疊克沿江城隘百餘處斬馘外援逆匪十數萬人合圍江甯斷其接濟本年六月十六日曾國荃率諸將士克復江甯外城殺賊數萬逆首洪秀全率其悍黨仍踞內城抵死抗拒茲復據

曾國藩奏官軍自得僞天保城後賊衆防守益密五月三十日李祥和等率隊攻克占取龍膊子山六月初一等日各營輪流苦攻李成典率吳宗國等從礮極密之處重開地道蕭孚泗等修築礮臺肉薄相逼十六日黎明曾國荃將四路隊伍調齊地道火發揭開城垣二十餘丈李成典武明良等身先士卒直衝倒口而入各弁勇蟻附齊進左路城頭之賊以火藥傾盆燒我士卒死者甚多大隊稍卻彭毓橘蕭孚泗手刃數人由是弁勇無一退者武明良率隊登龍廣山與右路太平門之賊

排列轟擊賊始卻退李祥和等從太平門月城攻入王
道和等進擊中路攻僞天府之北劉連捷亦率隊由
神策門地道之旁梯攻而入相與會合齊進鏖戰至獅
子山奪取儀鳳朝陽等門羅逢元從聚寶門之西由地
道闕口仰攻而入李金洲等從通濟門月城緣梯而上
陳湜等猛攻旱西水西兩門月城僞忠王李秀成率死
黨狂奔將向水旱兩門奪路而逃爲陳湜大隊所阻遏
仍轉回清涼山黃翼升等水師各營攻奪中關攔江磯
石壘乘勝猛攻濱江之賊與陳湜易良虎等奪取水西

旱西兩門由是全城各門皆破三更時分僞天王府及各僞王府同時火起烟燄蔽空洪逆率悍黨千餘人衝出僞殿前南門竄至民房袁大升等率隊腰截斬七百餘名奪獲洪酋僭用僞玉璽二方金印一方四更後賊股千餘人假裝官軍號衣向太平門地道關口衝突經崐字湘後等營截擊曾國荃又加派馬隊追至純化鎮生擒僞烈王李萬材復追至湖熟鎮將逃賊全數斬刈無遺據曾國荃親訊李萬材供稱城破後僞天王之兄巨王幼西王幼南王定王崇王璋王乘夜衝出被官軍

馬隊追擊將各頭目全行殺斃又據城內各賊供稱首逆洪秀全實於本年五月服毒而死瘞於宮院內僞幼王洪福瑱重襲僞號城破後洪福瑱積薪自焚李秀成一犯城破受傷匿於山內民房經蕭孚泗等親自搜出並搜擒僞王次兄洪仁達其餘兩湖兩廣等處多年悍賊經各將士於十七八日搜殺淨盡三日之間斃賊共十餘萬人僞王僞天將主將及大小酋目約三千餘名無一得脫者此皆仰賴

昊蒼眷佑

列聖垂麻兩宮

皇太后孜孜求治識拔人材用能中外一心將士用命成此大功上慰

皇考在天之靈下浮薄海臣民之望自維藐躬涼德何以堪此追思

先皇未竟之志不克親見成功悲愴之懷何能自己此次洪逆倡亂粵西於今十有五年竊據江甯亦十二年蹂躪十數省淪陷數百城卒能次第蕩平殄除元惡該領兵大臣等櫛風沐雨艱苦備嘗允宜特沛殊恩用酬勞勩

欽差大臣協辦大學士兩江總督曾國藩自咸豐三年
在湖南省首倡團練創立舟師與塔齊布羅澤南等屢
建殊功保全湘南郡縣克復武漢等城肅清江面全境
東征以來由宿松克潛山太湖進駐祁門疊復徽州郡
縣遂拔安慶省城以爲根本分檄水陸將士規復下游
州郡茲幸大功告蕝逆首誅戮實由該大臣等籌策無
遺謀勇兼備知人善任調度得宜曾國藩著加恩賞加
太子太保銜錫封一等侯爵世襲罔替並賞戴雙眼花
翎浙江巡撫曾國荃以諸生從戎隨同曾國藩勦賊數

省功績頗著咸豐十年由湘募勇克復安慶省城同治
二年連克巢縣含山和州等處率水陸軍各進逼金陵
駐紮雨花臺攻拔僞城賊衆圍營苦守數月奮力擊退
本年正月克復鍾山石壘遂合江甯之圍督率諸將士
鏖戰開挖地道躬冒矢石半月之久未經撤隊克復金
陵殄除首惡實屬堅忍耐勞公忠體國曾國荃著賞加
太子少保銜錫封一等伯爵並賞戴雙眼花翎記名提
督李成典於槍礮叢中搶挖地道誓死滅賊從倒口首
先衝入衆軍隨之因而得手實屬謀勇過人著加恩錫

封一等子爵竝賞穿黃馬褂賞戴雙眼花翎蕭孚泗督辦礮臺首先奪門而入竝搜獲李秀成洪仁達巨逆實屬勲勞卓著著加恩錫封一等男爵竝賞戴雙眼花翎等因欽此捷報中在事出力各文武給賞有差

七月普行賞賚

七月初一日

皇上修告成之禮各廟拈香

天地社稷壇盛京

三陵

東陵

西陵

太廟遣官告祭軍興以來各路統帥疆臣公忠體國共濟
時艱同心勦賊調度有方

特加異數

欽差大臣科爾沁博多勒噶台親王僧格林沁再賞一貝
勒令其子受封竝封

欽差大臣大學士兩湖總督官文一等伯爵世襲罔替江
蘇巡撫李鴻章一等伯爵竝

賞雙眼花翎陝甘總督楊岳斌兵部右侍郎彭玉麟均加
太子少保銜一等輕車都尉世職四川總督駱秉章
一等輕車都尉世職雙眼花翎浙江提督鮑超一等
輕車都尉世職西安將軍都興阿江甯將軍富明阿
廣西提督馮子材均騎都尉世職京口副都統魁玉
雲騎尉世職漕運總督吳棠頭品頂戴仍交部從優
議叙從前有功死事之臣分別

賜祭獎卹王大臣軍機章京閣部司官並優加獎勵

逆首洪秀全劉尸焚燬生擒僞王洪仁達李秀成凌遲

處死

曾大臣由安慶馳抵金陵先有僞宮婢爲湖南道州黃姓女子指出逆首洪秀全埋尸處所於六月二十七日在僞宮內掘出逆尸遵尙邪教不用棺木以繡龍黃緞包裹袴腳亦用龍緞頭禿無髮鬚尙全存已班白左股右膀肉猶未脫驗畢戮尸舉烈火焚之時方苦旱燔尸後大雨如注逆首雖逃顯戮於生前仍搜極刑於身後洵足大快人心其所擒僞忠李秀成僞王兄洪仁達二犯奏奉

上諭跳梁小醜無所用其獻俘且恐沿途派兵遞送騷擾
驛傳重累吾民著於江甯省城凌遲處死並傳首髮逆
所到各省以伸天討而儆兇頑等因欽此

湖北髮捻各逆竄擾麻城縣踞白杲

五月以後逆衆大隊漸集分擾新洲辛家冲柳林舊
街馬鞍山會龍山等處官大臣派提督成大吉督率
各軍層節掃蕩疊克賊巢捻逆復竄聚於麻城縣境
髮逆陳勝才等屯白杲等處麻城縣防守極密各軍
奮力圍剿僧王復派隊會攻總兵姜玉順等自陝帶

隊馳至兵力漸厚疊有斬擒七月十一日於麻城之木牌樓將僞天將蔣開揚等擊斃

鮑軍掃蕩許灣賊壘並克復崇仁宜黃東鄉金谿南豐五縣城

江西之賊分踞金溪東鄉宜黃崇仁南豐五縣城欲成長圍以困撫建而崇東踞賊恃許灣爲老巢由雙鳳嶺至洋洲徧築堅壘時江忠朝席寶田之軍方破崇仁賊壘並敗東鄉之賊鮑超因議先取許灣於七月初一日移營七里岡初四日督飭各軍四面環攻

逆衆拚死拒戰相持時許我軍愈戰愈奮用草填濠
極力猛撲先將雙鳳嶺琉璃岡九子嶺邨神嶺等壘
攻毀竝分隊敗赤橋許坊援賊各軍夾擊衝賊數段
隨將苦竹中州洋洲許灣賊壘一律削平敗賊掩殺
殆盡進追十餘里時崇仁賊勢已蹙初六日我軍六
路壓城賊尙傾巢出抗各營合力兜勦斃賊千餘初
十日進紮城根城賊侍逆開門出遁宜黃我軍收復
崇仁縣躡蹤追勦於十三日將宜黃縣城收復東鄉
之賊自爲我軍所敗後仍依城立三壘以圖死拒六

月二十四日我軍進紮梅花觜逼城而陣城賊出拒
敗之七月初八九等日又疊敗之賊勢已蹙初十日
開東南門向金谿一路奔逃鮑超督率所部尾追於
四鼓馳抵金谿賊於楓山鋪立壘十五座據山爲險
鮑超令各軍三路包抄鏖戰二時之久逆衆大敗立
將賊壘蕩平乘勝督隊由北門東門攻入卽於是日
克復金谿縣城計斃賊數千名陣斬僞成天豫吳自
成等賊酋九十八名奪獲器械無算時南豐踞賊尙
固守經楊總督派參將韓進春駐守建昌分勦上塘

新豐賊卡斃賊千餘南豐縣城亦收復

蘇州軍克浙江湖州之晟舍賊壘

晟舍居湖州之東憑河數道極爲險固逆衆守禦甚堅李巡撫派道員潘鼎新會同提督李朝斌進勦六月二十四日官軍分路環攻將賊營盡行轟倒乘勝過河痛勦賊於河內用木椿鐵簽抗拒各軍更番猛撲未能前進潘鼎新與李朝斌議定對面頭濠外築營壘便於轟擊二十七日水陸各軍分路齊進水師營官江福山帶隊登岸大呼躍濠各軍繼之錦山

熾里兩面逆援大至江福山摧鋒直前槍子洞胸陣亡我軍愈奮斃賊甚多賊始敗退七月初一日仍分路進攻賊添悍黨三四千人拚死拒守十一日潘鼎新令潘國揚等在北路廣搭浮橋一面晝夜輪攻牽制賊勢十三日潘鼎新親率潘鼎立等從北路進兵道員丁壽昌等田中路進兵副將夏金標等由南路進兵水師曾泗美臨河轟擊並令浙軍道員張景渠出隊協勦自辰至午賊營盡塌北路潘鼎立等先奪利濟寺卡繼破總管堂賊營中路丁壽昌等填河拔

椿攻破兩壘南路夏金標等與水師聯絡攻破靠塘
大石壘賊衆驚潰狂奔官軍合力窮追截殺過半計
蹋毀賊壘八九座斃賊無數賊險旣去湖州已在掌
握中

續克湖州府城

堵逆黃文金等固守湖州希圖另召賊黨抗拒李巡
撫派令郭松林等分路進攻逆衆於尹隆橋南岸堅
築壘卡掘濠釘椿防守甚嚴密郭松林等調齊開花
礮隊十五十六十七等日奮力轟擊黃文金復挑悍

黨數千繞呂山後路八字橋欲阻官軍糧道十九日
郭松林抽派李長樂等三營馳往李家倉搶築營壘
賊衆奮勇來撲官軍迎戰兩時斃賊甚多賊衆潰退
二十日湖賊大隊自尹隆橋接連八字橋等處延袤
二十餘里傾巢來爭郭松林飭易用剛分路迎敵山
上羣逆衝下郭松林率李長樂等捲旂突入縱橫盪
決並飭王平西礮船由河內助擊賊陣漸亂王永勝
等由山脊翻下疾如風雨逆衆遂倉皇分竄陣斬偽
烈王黃十四及餘逆數千名松林等以賊方聚守尹

隆橋猝難得手乃議避擊其虛二十六日別遣兵分道攻尹隆橋八字橋以綴賊而自督軍疾趨大橋後渡河圍攻賊營賊不意官軍猝至大駭愕立破其壘竝蹋毀旁壘十餘座二十七日黃文金率悍黨數萬來爭郭松林約束路之軍疾攻城而分兵三路拒戰黃文金銜力狂突我軍血戰力挫兇鋒賊乃潰退李長樂復破八字橋截賊當文金出犯之時昇山首逆棄壘先遁潘鼎新會合浙軍帶隊追勦至八里店水陸各軍併力夾擊賊衆大敗三里橋賊壘望風奔潰

李朝斌劉秉璋張樹聲等各進大錢口攻毀賊營竝至湖州城下沿途殺斃溺斃無數敗賊擠擁入城閉門不及潘鼎新等率勇先登由東門攻入斬馘甚衆立將湖州府城克復敗賊分道奔安吉松林追勦殲戮殆盡時長興守將知府吳毓芬聞信冒雨督兵克復四安鎮竝破梅谿竄賊

蘇州軍收復廣德州城

當官軍圍攻湖州時聞僞昭王黃文英方挾僞幼主洪福瑱據廣德李巡撫檄劉銘傳由建平馳赴廣德

七月二十九日前隊周盛波等進至橫山頭文英已挾福瑱出走甯國山中城賊猶迎拒敗之官軍槍礮齊發戰不逾時賊遽反奔追至廣德西門溧陽守將周盛傳之軍已至賊由南門逃竄截殺數百人立將廣德州城收復盛波追賊至甯國境盛傳追賊至安吉境皆有斬獲浙軍亦收復安吉縣城

僧王由豫入楚會勦髮捻各逆擒戮殆盡

髮捻各逆先屯湖北麻城縣之白果官軍攻急先後竄擾蘄水蘄州廣濟等處僧王親王上巴河與官大

臣會商合勦前後殺賊數千名斃擒首賊目亦衆大
股復竄皖境安徽喬巡撫松年督臬司英翰及郭寶
昌張得勝何紹彩等軍分扼英山霍山六安州等處
初敗賊於楊柳灣再敗賊於土門河紅花界羣逆知
金陵克復無巢可歸我兵三省會勦極嚴無路再竄
頭目汪世第張啓才李宏楊陳錦鳳等率二萬餘衆
投張得勝何紹彩軍前乞撫東商喬巡撫派總兵徐
鵬馳往受其降僞天將馬融和旋投誠於英翰郭寶
昌軍中僞端王藍成春亦赴僧王翼長成保處乞降

偽朝將魏康福范立川陳漢泰周添順等赴道員蔣
凝學等各軍前請撫先後遣散者不下十餘萬人賊
勢益孤偽扶王陳得才服毒身死蔣凝學飭令參將
劉維楨帶同偽將高啓成於長嶺菴山前掘獲尸身
解交僧王大營驗明剉戮所遺髮逆無多由僻路潛
散擒匪竄回河南

八月浙軍截勦竄賊大獲勝仗

浙江湖州敗賊由廣德分竄八月初三等日堵逆黃
文金一股竄至昌化縣白牛橋地方經分水守禦劉

光明等率隊迎勦擒斬甚多復經總兵羅大春等前
後來擊斃賊不計其數餘匪向昱嶺關逃竄其偕逆
譚體元等一股於初八日竄近涪安縣蜀口地方經
黃少春督軍分路進擊立斃悍賊數千名追至洪橋
頭逆衆憑橋死拒官軍分隊從後抄擊中路乘勢衝
殺追斬譚體元及僞樂王之子莫桂先等大小賊目
一百五十餘名殺斃轟斃及自相踐蹋死者約六七
千人生擒悍賊千餘名救出難民萬餘人初九等日
昭逆黃文英大股復由蜀口四嶺蠡擁撲營黃少春

督軍疊攻猛擊賊勢不支紛紛敗北復追殺數千名
江西軍敗賊於廣信

江西東路賊匪竄擾玉山等處經林珠等督帶兵勇
擊賊獲勝賊衆敗竄廣豐顧雲彩會同林珠追勦斬
殺甚多張岳齡李佑厚等復於玉山縣東擊敗賊股
盡將竄匪殲除時王德榜統軍由浙江馳入江西節
節掃蕩分隊鵬勦疊在玉山廣豐上饒鉛山界內大
獲全捷陣斬逆首洪元珍金信等多名會同黃少春
在鉛山界內勦撫兼施生擒僞譽逆李瑞生餘賊追

殺無算廣信府屬一律肅清

追勦湖州逆衆擒捕僞王

湖州逆匪洪仁玕等由新城敗遁記名按察使席寶田督軍晝夜緊追及之於廣昌白水嶺等處殲斃多名逆衆遁踞古嶺憑險堅拒官軍斬關而入自相踐蹋四散逃竄席寶田令各營分隊搜勦自率輕騎疾進生擒洪秀全之弟僞干王洪仁玕等逆酋多名及老廣賊七八百名羣賊千餘名殺斃三千餘名解散數千名奪獲騾馬洋槍不計其數各營復陸續搜獲

偽傳御列王百數十名及洪秀全之兄偽卹王洪仁政黃文金之弟偽昭王黃文英

九月鮑軍飛援甯都州力戰解圍

汪海洋逆股自許灣敗後率悍賊數萬攻撲甯都署知州郭毓龍等登陴固守斃賊千餘鮑超率所部由池埠進援九月十一日逆分三路出逼官軍營壘賊陣林立山岡彌望無間鮑超指揮諸將布置甫定逆衆拚死衝突洋槍洋礮子如雨官軍五路齊進敗其前隊譚勝達唐仁廉等軍盡力衝勦左右兩路之賊

登時潰退周有勝等直搗中堅馬隊各軍橫截直衝
十盪十決賊勢不支官軍追至山下圍殺方酣另股
從山嶺壓下拚命搏鬪適譚勝達等馳至斷其歸路
賊遂大潰官軍追殺四十餘里將吳口渡張連湖坑
山港烏林壩等處賊巢悉數蹋平積尸徧地十二日
辰刻直抵甯都州埭平城外數十壘立解城圍共計
斃賊萬數千名生擒二千餘名內有偽朝將王金瑞
等賊目一百二十餘名立於軍前正法

江西軍生擒偽幼主洪福瑱粵匪平

偽幼主洪福瑱一犯前於江甯攻克時據擒賊供稱
已積薪自焚嗣聞浙左總督探明洪福瑱實已潛蹤
逃竄奏奉

諭旨飭令跟蹤兜拿逆衆被官軍追勦屢次敗衄由安徽廣

德逃往浙江復出竄安徽甯國績溪自浙江遂安一
帶遁入江西廣豐瀘溪官軍沿途躡勦追及於廣昌
石城地方將各逆首斬馘殆盡幼逆尙未就擒席寶
田一軍移紮石城派員帶隊搜拿九月二十五日游
擊周家良於石城荒谷中將洪幼逆拿獲粵匪遂平

捷上奉

旨該犯係洪秀全之子么麼小醜漏網餘生不值檻送京師著在江西省城凌遲處死以快人心等因欽此江西巡撫沈葆楨

賞一等輕車都尉世職頭品頂戴署浙江提督鮑超封一等子爵記名按察使席寶田

賞雲騎尉世職

賞穿黃馬褂閩浙總督左宗棠

錫封一等伯爵浙江布政使蔣益澧

賞騎都尉世職蓋自道光三十年廣西創亂以來至此凡
十有五年蹂躪幾徧天下翳古小醜跳梁從無如是
之日久地廣者仰賴

文宗顯皇帝

兩宮皇太后我

皇上廟謨廣運指示機宜各將帥黽勉圖功大彰

天討不惜帑金以養戰士不吝爵賞以旌有勞卒至醜類
盡殲大功底定自僞幼主授首後逆氛已全數盪平
遺孽併入擒匪之中間有未淨竊計魂游釜底殘喘

稍延泰階之平指日可待爰記始亂及勘定大概以備

方略館采輯而垂鑒於我

大清萬萬世云